

同州府志

卷三十一

列傳下二

同州府志卷三十一

列傳下

明

潘友直字孟舉澄城人洪武初由茂材從太祖克陳友諒
屢畫奇策陞工部尙書所至輒有聲績習儉服勤終始如
一後乞骸骨朝廷寵賜金帛歸邸悉賞軍士同妻驅驢而
歸行李蕭然惟圖書數卷而已

府志

盧崇邵陽人幼讀書明大義洪武二十五年再從兄居爲
吏坐法戍遼東亡捕之不得檄取充伍逮及婦人舉族驚

惶謀遁崇毅然以身代其妻王氏請借往是時生子讓未
彌月居妻請代撫之於是舉族餞崇羅拜痛哭崇慨然登
車去旣至遼立軍功遷小旗夫婦俱壽終生二子曰敏曰
聰讓聞父母歿徒步至遼與敏聰相持泣旣而言歸葬二
子爭之不能決訟之有司令鄉人議之讓曰閭關數千里
至此謂何不能歸葬有死而已乃蓬跣卧墓側號泣不食
數日二弟知不可奪聽其扶歸後兩地子孫日蕃讓之六
世孫醇順治辛丑成進士敏之曾孫表以戰功世襲百戶
表之孫韞道崇禎己卯舉人韞德同科武解元韞德子士

俊爲松江知府士傑康熙癸卯舉人

府志

尙士行名志以字行同州人時中子學通五經元末隱居白水龍岡山學者稱南岡先生與蒲城趙孟暘馬巨江等樂道講學號五友明初孟暘爲學士薦於朝詔授本學訓導士行經術行誼久厭衆心至是以斯文爲己任士皆翕然慶得師開文明於草昧士行有力焉其子孫世明經學稽古之榮至今不絕

大荔志

郭良字文易同州人洪武十七年甲子舉於鄉明年四月除邯鄲教諭遷秦府紀善隨王入覲上覽所作訓世子格

致誠正修齊治平詩忠愛懇至擢河南布政司左參議歷
本司參政建文元年陞北平右布政靖難兵起禦於白溝
河良執戟逐文皇將及被樹枝掛冠文皇得逸去及登極
良乃棄官遁山中搜獲至京上問曰爾彼時及朕當如何
對曰苟得申匹夫之義臣罪不勝誅矣上曰忠臣也勅遣
安撫晉中祇誅逆命者數人餘悉放釋命監修武當廟祠
工竣以羨金簿上進兵部左侍郎督師征交趾事平加本
部尙書行軍大司馬廉督南省漕運糧儲永樂二十二年
乞致仕抵陝州甘棠驛復被旨召回勘五省水災據實奏

聞上嘉悅之賞予優隆並賜宴贈詩宣德二年再乞休歸
卒於家良有文武才每視師策駿馬持長戟督戰指揮英
勇不殊健將雅善吟詠嘗於御前與學士解大紳競敏上
稱之曰解縉生知郭良學知歸里後結廬敷谷鑿渠引流
溉田千餘畝鄉人利賴焉著有詩集數卷

華陰志

高翔朝邑人有文學矜名節洪武中以明經爲御史諸所
論奏無不關國家機事當上心者建文時尤戮力戎事激
發忠義靖難後上召翔翔喪服入見大哭語又不遜遂族
翔沒其產諸給高氏產者皆加稅曰令世世罵翔也親戚

悉戍邊又發掘先塋雜牛馬骨焚灰揚之而以其地爲漏

澤園

朝邑志

程濟本姓成朝邑人以明經爲四川岳池教諭距邑數千里往來於里而岳池學事不廢建文初上書言某年月日西北兵起朝廷謂非所宜言繫至京將誅濟召入仰而大呼曰陛下且囚臣至期無兵臣死未晚也遂下獄已而兵果起赦濟以爲翰林編修充軍師護諸將北行徐州之捷諸將樹碑叙戰功及統軍姓氏濟一夜潛往祭碑人莫測其故後文皇過徐見碑大怒趣左右椎碑一再擊遽曰止

按碑族誅無一得脫者惟濟姓名以椎脫得免曩之祭蓋
禳之也初濟與邑人高翔竝以明經徵翔厲名節濟好奇
術翔止濟勿爲濟不聽已而有兵事濟又勸翔學其術翔
曰我願爲忠臣也金川門破翔召濟死事濟曰願爲智士
翔竟死之建文急召濟入門計濟曰天數已定惟可出亡
免難耳建文如言濟從之每遇險幾不能脫賴濟力得免
從行數十年後又隨如南京人尙識濟後莫知所終其子
廉善鎗文皇嘗稱成國公鎗法後知有廉召與成國校併
於殿庭廉進退敏妙成國弗能當也上心賞其能命爲錦

衣衛千戶子孫至今猶有存者

朝邑志

楊恭朝邑人初爲給事中厯刑科都給事靖難師起朝議命曹國公統師問罪恭疏言宜先遣使講和不宜輒行征討忤旨黜爲蒙白縣幕文廟卽位檢閱封事諸言進兵者皆罪之唯恭主和議甚喜問恭何在得至命除爲布政使部難之以爲他省無缺獨缺在陝西恭不得往上曰朱買臣不爲會稽邪恭笑不可遂給勅令馳傳往恭徒步之官廉得賊吏多所貶退居九年以廉貞終於左使蓉塘集云永樂二年以刑科都給事楊恭爲陝西布政使次日陛辭

蓋文獻足徵矣

朝邑志

董龜同州人宣德壬子舉人正統中教諭芮城歷郟府教
授淮安府知事陟知海州海故患虎龜至遂絕蝗亦不災
州人有德被山林消虎患化行田野絕蝗災之頌景帝知
其賢召見賜鈔遷吏部文選員外英宗復辟改知膠州課
農興學士民宜之禱旱屢有奇應他邑人聞風附者二千
餘戶龜素清謹政教皆崇德愛故所至有績膠州以名宦
奉祀

大荔志

雷霖字鴻濟華陰人生而美丰儀見者比之玉人讀書一

過卽通景泰二年庚午中式省試第一天順丁丑會試總裁官奇其文復擬元他主司以陝籍抑置第二人廷試再屈列三甲選庶吉士授職檢討霖旣負俊才意不可一世酬答間多放情之言有忌之者改德藩長史擢山西提學副使秩滿歸卒老於家論者惜其位不副才也詩歌古文辭豪宕不羈工草書自成一格創編邑誌人謂其具得史家遺法惜爲後之修志者刪改俾善本無從觀矣曾孫應志以陽曲籍登萬歷甲戌科進士

華陰志

張壽華陰人賦性剛毅景泰癸酉年以禮記中鄉試科赴

吏部候銓知縣得山西榆次榆次俗任俠使氣好勝恥屈
恒以術挾持官府長吏稍不如意卽多方排之去壽悉知
其弊方壽之需次也與榆次生某同寓舍甫投官榆次生
具酒饌爲賀漸以言餽之壽大怒曰我爲榆次令爾爲榆
次民敢溷我耶命僕仆之地手杖之去之官時兩僕荷行
李壽杖而步隨至保定榆次丞遣夫騎來迎壽斥却之抵
縣卽申丞不當動夫馬迎令請褫丞職旣視事獲殺人盜
讞具堂階左掘一坑埋盜至肩以挺碎其首死擁土爲墳
有不孝子父母首告供實立柱殺之埋堂階右亦爲墳左

右纍纍相對曰張知縣不用大明律也榆民爲之股栗而思有以中之者益急矣值鄉試期上官檄壽爲廉官羣俠求貌類壽者僞爲壽輿馬隸役悉備遣前驅一人至他邑置宿所謂主人曰榆次縣主至須得密室爲館縣主久清苦至此欲假數日娛樂可備歌者主人素聞壽名盛具以待旣而僞知縣至主人侍飲頗洽更餘從容言曰某有家樂欲暫令侑觴僞者笑曰可笙歌旣懽且代輸纏頭百金明日知縣去主人不知其僞也適壽以會勘事由旁縣入省久之他邑人以里長科銀控按察司訊之乃爲榆次令

賞歌妓費秉臬者疑之又以壽未經此途察訪得實悉寘之法壽雖嚴刑峻法而冰蘖自守九年不替成化二十二年行取授工部主事歷員外郎郎中干請杜絕人以壽刑人之狀呼爲張扯鑽孝皇亦聞之一日上幸後山壽巡視皇城杖人大內聲徹御座上問之左右以張郎中杖人對上笑曰從渠扯鑽在部六年不調致仕歸

華陰志

張之掣字儀正華州人業太學以思親歸省至真定夢老父謂曰汝母疾汝宜亟行覺而大懼兼程至家母果病延醫問藥夙夜衣不緩帶母卒哀毀踰禮旣殯廬居墓次雪

夜伏墓哭曰吾母素畏寒吾母寒矣聞者悲之墓岡下忽有泉湧出清冽異常里中一少年素逆於親一旦市肉以進其父異之曰吾見張孝子矣彼爲死者猶哭我親生敢不孝耶里人以是化焉竟以墓次風寒遘疾卒

府志

屈直字道伸華陰人曾祖亨敦尙節行洪武初書幣禮徵不應祖韶隰州同知父宏仁績學不遇以直官封奉直大

夫刑部員外郎直生而聰敏過人六七歲時父口授四子書及詩歌卽記憶不忘未冠補邑庠生成化十六年庚子舉於鄉甲辰成進士家居值歲大饑絕糧某推官者以賑

至直往謁乞賑推官曰邀直會食而不與粟直疑之辭曰
使君法官日訊罪囚數數見邀恐生物議推官曰子貧甚
賑能幾何吾所訊囚當重譴所以邀子來者示厚子彼必
求援可獲金自贍矣直曰荷使君高誼但直方進身之初
當清白自勵賑則可受若賂援罪人則不可且污使君名
尤非所願也推官嘆服丁未入都授刑部主事執法無所
撓大司寇甚禮重焉故事郎中缺員印必他司郎中署卽
員外郎亦不得時郎中俱出勘司寇輒命主事署印直以
故事辭司寇曰主事非常主事亦不可以常格待也刑部

主事署郎中印蓋自直始獄卒索囚賄不如意往往縊殺之直廉知其奸適有報囚自縊死者驗係勒斃窮泊得其情狀卽白尙書論抵如法卒乃無敢殺囚者錦衣黨惡憑依權要包納郡縣賦稅輒局誘解人代納號稱攬頭剝噬侵吞每致解人負累破產事發到部尙書畏不敢究直力爭始允及逮繫攬頭權要果邀奪而去尙書懼且怨曰我固不許今何如縱之碍法急之部且多事矣而急赴錦衣謝直曰直自有處公勿慮也明日入朝言於錦衣之長曰攬頭犯法刑官逮之奈何弗與錦衣朝廷瓜牙賴以緝奸

乃反不容法司持法耶事須奏聞其長懼遽出諸犯嚴追
賦銀仍譴責如律由是威聲震一時宏治壬子陞員外郎
再陞郎中遼撫某與武定伯某交惡訐奏奉命勘問讞成
疏論武定之罪無少恕辭勲成爲之屏息丙辰出爲四川
重慶府知府初抵任吏持供應規簿悉取之行賈者約八
千餘金求征之直曰小民營利爲生何預於官而爲此橫
斂耶取簿焚之府有妖物擲錨石傷人又遺火延燒公私
房屋直乃具牒斥數郡之神明崇頓息境內旱或云眞武
山神素著靈佑所之輒應乃步歷重崖以民命虔禱比下

山有白雲如蓋隨之俄而大雨遠近淪浹歲獲豐稔郡之士大夫作三異記以頌之越九年以撫按交薦陞浙江按察使再陞河南布政將之任司禮監巨璫劉瑾來籍故都御史錢鉞家資未至鎮守等謂曰劉太監聲勢甚大公主事難濟矣請暫畱迨璫至果作威欲三司跪謁直率衆不屈璫怒甚衆懼莫敢言直從容曰朝廷之下衙門最大者內府司禮監天子之下內臣最尊者蟒衣玉帶太監我輩曷敢不敬第不知見怒何也璫卽改容曰憲長好人援直手揖入坐衆謂旣不激彼怒又不瀆禮也甫至河南陞太

僕卿太僕馬利近倖相沿爲奇貨寺卿莫可誰何直剔刷
禁絕罔政爲之肅清近倖恚恨交譖於瑾瑾令偵察盡得
其情乃謂人曰屈某好官太僕官久習污濁今別是一衙
門也諸譖不行遷南京操江都御史復改南京大理卿未
幾授漕運都御史直以運艘率多稽遲爲置方眼簿給付
運官日記水程及沮風守淺時日以備稽考其法歷久用
之故事都御史例坐漕運總兵左瑾不悅曰都御史豈大
於公侯伯今屈某坐伏羌伯毛銳左且云舊例我差人拿
來看是舊例否然瑾素知直難屈亦不復問也瑾旣敗某

御史倡言直爲瑾鄉人故得數陞擢宜罷遂致仕某御史者直接察兩浙時爲歸安知縣被民告許科斂贓私至巨萬直接勘之知縣懷三百金求解直叱却而按治益急會遷河南乃止至是知縣爲御史赴京途次淮上入謁漕府執禮甚恭直喜畱之宴飲談及浙事忘其爲某御史也因言平生未嘗分毫苟取如浙屬一縣令犯贓餽金求解當時叱出今猶耿耿不知其人何如也某御史色沮愈恭直怪之別去諦思則卽其人也悔已無及矣某御史入京而瑾敗當時科道皆嘗伏謁瑾惟某御史始入臺於瑾無染

故得肆意傾擠也直爲人剛毅無所曲屈明幹有爲歷官
皆著卓績而胸懷坦白疏於防檢與人言侃侃無隱故卒
爲宵小所中傷云里居二十年年七十四卒訃聞朝廷遣
官賜祭爲營葬事子召國子學生嘉邑庠生女淑聰慧能

詩適山西布政司參議朝邑韓邦靖所謂五泉子也

華陰志

王輔字良弼同州人成化壬辰進士知長垣縣用嚴明治
時荒後民逋三年賦監司督之急輔從容調度畢辦民不
知苦邑東北泮浚每潦集萬頃俱壑輔渠疏之盡爲良田
又修城繕學皆不損下而工就居四年徵爲監察御史出

按四川風稜震讐貪奸斂迹然剛刻負氣多與人忤已陞
浙江按察僉事尋謫鄖陽府同知以事罷歸

大荔志

張達字雪山白水人由邊功掛將軍印總兵大同虜大舉
入寇戰歿贈光祿大夫上柱國諡忠剛從祠武廟達不知
書然慷慨負節膂力絕人每遇敵好離營陷陣所向有功
卒以此敗邊人至今稱之子世英世俊世傑猶子援皆指
揮使英世襲俊官總兵掛印大同援戰亡蔭子一門武功
稱最盛云

府志

張曰炳字晦叔同州人知府守訓季子性醇篤好學凡圖

緯書數至稗官醫卜靡不綜獵恬於勢利不就有司試或
諷之傲然不屑與馬林友善日夕揚考古文辭郡中風雅
一振爲文典古華瞻卓有矩矱著張晦叔詩集八卷武城

一卷

府志

王盛字懋德號竹室韓城人成化乙未進士任戶科給事
中山西布政司參政嘗受業文清公之門孝友嫺恤俸祿
之入盡以散族人親識家無餘貲行部河東韓人有見者
延款無倨色閩里相傳以爲榮幸過汾陰謁后土廟見側
祠有十六羅漢像去之有狄梁公之風韓俗喪葬媚佛盛

非之獨祖奠以禮自是士遂移風焉先成化甲午薛封池
蓮一莖雙花乙未春盛與馮義成進士先後俱授給事中
人以雙花爲瑞蓮謁盛記之盛以花雙而實異因記以自
勗其畧曰彼澤之陂有蒲與荷荷芙蕖也其華齒萐其實
蓮以蓮花爲君子者周濂溪也以蓮花爲淨友者曾端伯
也比興之義士當以之今韓之蓮一莖雙花瑞也顧實有
不同焉可繹也何也科之登也同也得其人則足正君善
俗則足修政立事而祿位崇焉此蓮房之大而實者若以
示勸也非其人則名實未加於上下責任空託於一身而

卑黜隨之此蓮房之小而未實者若以示戒也繹示戒而
戒之繹示勤而勸焉堯舜吾君民位育吾寰區如此則器
之成也大人與蓮並瑞矣此盛之文詞概見者也據此一
齋而測之盛其卓犖士哉其沒世不亡也殆桃李之下成

蹊乎

韓城志

趙繼爵字世忠同州人風儀俊偉中坦無城府宏治癸丑
登進士授行人選南京廣西道御史丁艱起除雲南道巡
鹽兩淮陞知兗州府調大名尋陞山東按察副使備兵臨
清有治績充屬沂剡滕費諸州邑積年通賦建議蠲罷時

金鄉魚臺有左道惑民者監司欲以叛治繼爵力言此愚民被誘若坐逆則無知就戮者多第法其魁則餘衆自解所活甚衆薊賊劉七等作亂攻城繼爵聞變急築外郭七十里浚濠崇櫓除戎馬以備賊不敢犯尋免歸繼爵恂謹友愛又喜賙賑以此爲族里所頌兄繼宗以鄉舉爲令子

國良另有傳

大荔志

趙國良字邦遂繼爵子風度高朗有智畧然居嘗恂恂尤恬於名位初以制科授工科給事中不阿權貴南畿與江右軍民仇殺獄三年不決當事者請風力科臣鞠之延推

國良往勘一訊而決會大察以飛語謫孝義丞量移宜興
令遷彰德郡丞宜興民赴臺乞留以干計尋晉度支郎後
出守太原值邊警國良圖畫方畧防禦甚周已與同官分
城而守難民蔽野求入他皆嚴拒國良獨啟鑰納之事平
民爲立生祠以功進按察副使備兵潞安居無幾論調時
年甫艾卽堅意不出闢園林與親友觴叙其中嘉靖丙午
忽訛言虜至鄉聚爭趨城州守恇惑不敢納國良戎衣仗
鉞坐西門上納之內外依以爲重州人至今頌說

大荔志

魏津字宏濟邵陽人父銳以津貴贈如其官津由宏治舉

人除知河南偃師縣有清操滿秩陞雲南臨安通判以終
養歸未幾丁外艱服闋又補四川重慶通判正德丁丑自
乞休致年八十卒祀偃師名宦祠其邑志云津持守端方
居官平易修文廟建鄉學纂邑志緩征輸在任九年士民
不擾誠循吏也子四長延捷學生幼穎異有神童之名早

卒季廷揆別有傳

郟陽志

王傑字文英郟陽人幼爲諸生有文名學使戴公珊見其
文嘆曰此三秦豪傑也拔之遂食餼楊公一清尤愛敬焉
嘗標示其文於列郡以勗諸生一時聲譽藉藉舉宏治乙

卯鄉試正德時通判開封擒鉅盜閻景和又被賊於鈞州
民賴以安傑爲人質幹廉以律己公以處事有不可者雖
權貴臨之弗挫也尤精律學斷獄悉得其情吏民憚焉巡
撫河南都御史蕭公翀委視屬邑恤民隱祛吏弊恩威並
用境內肅然以勞瘁致疾卒於途啓行笥有書數帙布衣
二襲錢僅三文而已觀者莫不嘆息泣下云

句陽志

尙衡同州人字一中宏治王子省試第二丙辰登進士拜
工科給事中清寧宮災衡上封事以爲天子倦勤所致會
詔求直言兩上書各陳四事其後又造延壽塔衡上書極

諫上爲改容罷其役已遷吏戶二科數劾論大臣不法事
武宗卽位又上封事二十餘詞皆切直於是當路銜之出
爲浙江右參議值歲饑賑賚多所全活陞左參政復改山
西河東道下車戢橫藩擒巨盜移守冀寧會流賊薄太原
急時官兵已調防澤潞衡募壯士嚴城守又檄材官設伏
盤駝坂下賊偵知悉遁去巡按素不善衡至是劾其玩寇
衡亦奏書自理皆左遷衡遷漢陽知府至郡旬餘卒衡負
節氣嶽嶽不能下人居朝勁直敢言廷臣皆敬憚之卽見
妒外補氣不少降管入賀時逆瑾用事惡人高幘或令衡

暫易衡曰大丈夫寧爲一刑餘改度乎其特立類此建樹未竟以死有奏議二卷藏於家子班爵另傳子班命侃侃有父風以明經丞阜城戇直不阿上官棄職而歸人謂其不墮家訓云

大荔志

王命字子將同州人嘉靖己酉舉人慷慨有膽畧乙卯歲凶地震官民廬舍城垣盡傾盜麻沸所在抄掠人人自危命時宅憂糾宗守望其弟弗良卽勒令自盡於是威望大著賊不敢近州使君聞之就命問計因假之事權命乃墨衰仗劍金鼓稱媼巡行鄉聚訪緝大小偷或挺或刺或束

而詣吏折其足棄諸隍死者枕藉道路以目州境賴以安
兵使者聞之造門謁謝然中不無少濫亦有斃於睚眦者
後遂致訟陷獄已理出銓知蔚州弗久卒於官

大荔志

張思靜字伯安同州人績之孫少警敏美容儀從學韓恭
簡稱高弟登嘉靖丁未進士選讀中祕書改授刑科給事
中累晉禮科都給事嘗奏彈英國公某邸都尉某權貴斂
避時朝廷以醮典不可科臣會公疏失檢六垣皆廷杖尋
出爲四川參政督採木之役官民樂其不擾有汪四者倡
白蓮教稱亂用計擒之以艱歸起分守河南伊庶人方橫

魚肉官司獨不及思靜是歲提調省試程文多出其手已
擢觀察使居亡何被病歸里卒思靜溫和坦易善以詞色
遇人卽人有急復能力振以故人多德之有詩草一卷藏
於家子養心爲縣令養蒙參政蜀藩

大荔志

馬自強字體乾同州人嘉靖庚子省試第一癸丑成進士
入翰林授檢討進修撰以校錄永樂大典進侍讀已爲司
經局洗馬國子監司業祭酒詹事府少詹事掌院學士教
習庶吉士經筵日講官禮部左右侍郎吏部左侍郎禮部
尙書世宗實錄成以副總裁進太子少保知貢舉後以太

子太保兼大學士入直文淵閣自強儀觀豐偉音吐如洪
鐘性端方博大人不可干以私歷事三朝館局十數年清
嚴特著三同考會試一主南畿試所錄多名士在成均申
功令訓厲學官諸生抑請託疏壅滯士論歸之部務故皆
關內閣自強至禮部曰尙書國之大臣乃仰承政府風旨
哉一惟任法而行會郊社幸學藉田及大婚慶成諸典禮
皆所贊襄又考定宗戚文武大臣恩恤例各著爲籍胥無
所奸以虜賞逾額請明初約示國威信皆報可時江陵長
居正秉國頤指朝臣自強於內察首黜其幕賓郎中

權瑞馮保勢傾中外爲其庖役求冠帶不許提點張
謀復真人位號二人力爲徯息自強而折其不可上疏劾
之及江陵奪情議起復不爲避於是譽望巋然至見之歌
謠及入閣閣務皆首臣專之其次拱手受成自強獨有匡
正曰吾恥居伴食之名也然十九齟齬不得行鬱鬱感疾
薨贈少保謚文莊優詔卹廕文集二十卷行世按西安志
馬自強爲講官穆廟語國臣曰惟馬自強講朕多省悟每
講退輒稱善入內閣未久卒於位公少讀書太華山與二
三交契以道德文章相切磨人以韓琦范仲淹稱之

大荔志

張守訓字式卿同州人精敏有幹畧善爲說辭嘉靖甲子
舉省試第二萬歷中除知朔州遷重慶府丞皆以宜民畱
去後思入爲刑部員外以親老疏請終養起補戶部管稅
務及明智坊草場歷有能績後由郎中出守遵義遵義者
故番地勦平楊酋而設者也初守訓在重慶值酋之獄勘
者多規避守訓往得其情法已有勦議守訓謂應龍妄殺
誠有罪然所殺妻孥與部下耳非仇漢人而著逆節也不
若以戰功贖其死罰令自新便不報及應龍反人多易之
又上言今承平久民不識兵且酋亦非易與者雖終當就

擒恐乘虛襲我所失不小當早爲備復不聽迨應龍殲白石屠綦江三蜀震恐始皆服其言卒費國家數十萬金經八載而後平旣設郡督臣請能善後者遂以守訓往或止毋行守訓叱馭疾發到郡披赤平情夷漢咸悅俄病卒

大

荔志

趙儒字席珍同州人居渭北里自號渭北父龍舉人任延津訓導擢長壽令無子乞嗣於唐崔珏之祠世所謂崔府君者夜夢府君捧綵色盒中貯玉孩授之曰以此爲汝子當有文才其官秩亦如吾也遂生儒穎儁異常兒正德十

一年丙子舉鄉試明年丁丑卽捷中進士科授工部主事
會武宗巡幸塞上儒在侍從繼復南幸炎徼仍詔儒行儒
疏諫止之忤旨勅差宣大整理運務轉員外郎嘉靖癸未
陞屯田司郎中時議大禮具疏又忤旨且名列疏首受廷
杖繼出爲四川叙州府知府撫夷惠民政著卓績告養親
回籍壬辰丁母憂戊辰起補永州府值世宗幸承天馳至
襄陽迎鑿蒙賜紵絲白金并奉旨以忠懇効勞叙資擢用
比至永州儉以立廉仁以行惠萃一州六縣之英而教育
之民懷士悅丁丑隨例入覲至都一無饋遺過朝謁冢宰

某某愠見於面曰今者知府不職俾屬吏恣情刻剝多得金錢從而染指簞簋不飭之誠如官箴何儒抗聲對曰永州無是也他郡卽不可知朝廷患此但當清其源以正百官耳時覲臣皆爲失色儒坦如也都御史王浚川見其語含譏諷謂曰太守毋再言儒曰卽今直道不行竊恐污濁富貴冢宰以抗禮斥之儒知事不可爲乃引歸講學於洛渭之側從之者多所成就嫻詩古文辭丐求者幾無虛日壽八十九歲卒於家祀鄉賢所著有渭北集行世先是檢討雷霖剞輯邑乘儒復取而增益之亦稱善本後爲重修

者刪改失其本來矣

華陰志

韓邦靖字汝慶朝邑人紹宗第三子生而靈異號爲奇童五歲讀文王至德篇掩卷若有思者父問之對曰卽如是武王非矣父大奇之八歲通舉子業十四舉於鄉二十一舉正德戊辰進士拜工部虞衡司主事奉部檄監十庫與奄人抗禮奄人絀服已遷員外郎都水司郎中是時詔求直言邦靖乃上疏曰夫民者樂安而思治惡危而厭亂向背之際甚可畏也臣竊見陛下自卽位以來朝政不修經筵罔御盤遊無節狎近羣儉摧折骨鯁之臣閉塞諫諍之

路百度乖違庶事叢脞府庫空竭閭閻流散盜賊災異薦
至迭興危亂之形已成社稷之憂將大頃者乾清宮災陛
下下詔求直言在位羣臣疏論剴切時政缺失指陳畧盡
天下之人皆以爲天心仁愛啓佑聖衷必將延覽聽納革
既往之愆圖維新之化潤澤生民永昌社稷在此一舉不
意陛下徒事虛文不修實政凡諸過舉仍遵往轍臣工章
疏罔有施行而部官黃體行乃又以言罷去天下人心莫
不囂然沮喪以爲陛下遭此大異因循恬安尙復如此是
陛下無悔悟之期天下無治安之日渙散支離不可收結

書曰民可近不可下下尚不可而况使之離哉夫親離者
家散民離者國搖故漢儒有土崩之言先哲有搏沙之喻
臣每念及此實懷隱憂伏望陛下以社稷爲念於以收旣
散之人心迺將來之福澤疏上天子震怒下錦衣衛獄給
事中李君鐸率衆論救乃得奪官爲民辛巳秋世廟卽位
起爲山西左參議分守大同革奸平獄權豪斂跡是時天
子修定策功封爵太濫而高山陽和諸衛軍士奉例開墾
草場數千餘頃皆爲豪家占種乃前後上疏論列又皆不
報未幾大同歲饑人相食又奉議請發內帑賑濟不許爲

之慙然泣下復抗疏論列又不報復疏乞歸疏報未下卽
行西歸之日軍民遮畱號泣不忍舍去抵家乃損食不豫
呼苑浴子曰吾其逝矣十九日必大雷雨其日果大雷雨
尋卒時年三十六先是正德時上早朝御階有匿名帖言
瑾罪惡瑾矯旨命各官跪奉天門下是日天暑酷烈又無
片雲僵者數人邦奇體素羸至午氣微昏眩呼曰死矣安
得少水活我衛士剖瓜飲水邦靖匍匐攫取食兄兄得甦
同跪者以失儀爲懼邦靖曰救兄獲罪所不辭也樊參議

爲立孝弟碑

朝邑志

韓邦奇字汝節紹宗次子學有本源學者稱苑洛先生治
尙書時卽著蔡傳發明禹貢詳畧宏治甲子乃以書舉第
二人會試不第歸著律呂直解見志正德戊辰成進士授
吏部考功司主事陞考功司員外郎明年辛未考察都御
史私袖小帙竊視邦奇曰考覈公事有公籍在何以私帙
爲乃掣其帙封貯不檢都御史爲遜謝同曹郎皆縮項失
色尋調文選司太宰托意爲官擇人欲發視缺封邦奇執
不可曰發則有私諸曹咸依阿邦奇執愈厲卒不更太宰
銜之未幾京師地震上疏極論時政關失謫平陽府通判

決滯獄倡理學號一時卓異甲戌陞浙江按察司僉事所
泣疏寃雪枉抑強扶弱除貪獎廉節財愛民而不畏權要
不憚險難尤人所不及它時浙無巡撫統攝故賦役獨稱
煩費邦奇理其事張弛裁割身當怨勞釐爲四科事從節
縮法嚴徵散公不費供私不厲民歲省以百萬計抵今遵
承命曰韓公科條焉逆廝錢寧託寵義子以鈔三萬錠付
浙省易銀當事者斂餽如其數邦奇檄知縣吉棠散其斂
卒不餽宸濠將舉逆先命丙豎假以飯僧聚千人於杭州
天竺寺邦奇過寺見之立爲散遣濠又以儀賓託名進貢

假道衢州邦奇召儀賓而詰之曰進貢自當沿江而下奚
自假道歸語爾主韓僉事在此不可誣也後三年濠果通
謀鎮守欲襲浙江賴前事發姦不竟逞邦奇謂鎮守爲浙
之蠹不少假借鎮守怨之奏邦奇擅革進貢誹謗朝廷逮
赴詔獄詔奪爲民旣歸謝客講學四方學士負笈從遊者
日衆乃著周易集說以覺來學辛巳世廟詔起爲山東布
政司參議尋乞休甲申復用言官薦起山西左參議是年
大同巡撫都御史張文錦偕亂遇害官守竄匿紀綱蕩廢
邦奇欲入大同城去二舍許遊者使二人露刃迎且宣言

城不可入是夜故燒參將宅以懾之邦奇單車入城時諸
司無官邦奇獨任其事約法二條以戢暴亂曰大夫出疆
安利所在專之可也幾兩月鎮城雖稍安人不自堅因事
屢變邦奇率以誠信感格不至成亂十一月上遣戶部侍
郎胡公瓚提兵問罪疏其姓曰罪人得獲卽日班師鎮人
聞之大譟復謀殘虐邦奇迓侍郎於天城以處分事宜馳
白都御史諸軍聞言出於公信之始解兵翌日傳首軍門
邦奇謂侍郎曰首惡旣獲宜速給賞使城人畏威懷德亂
可彌寧侍郎不聽復生他變假使當時卽任以巡撫宣布

恩威可無再舉顧使不終而代惜矣乙酉竟致其事而歸
戊子起爲四川提學副使尋改右春坊右庶子兼翰林院
修撰經筵啟沃關繫重大其秋主順天鄉試命題斥當時
權力柄事不悅言者承風旨謫南京太僕寺丞己丑再疏
而歸尋陞山東按察司副使大理寺左少卿以左僉都御
史巡撫宣府至鎮謂戰馬倉糧皆邊務之首卽平市估以
易馬出紅腐以足軍咸爲感悅時大同再變王師出討百
凡軍需倚辦宣府悉力經理有備無乏乙未入佐院事與
掌院尙書王公廷相同寅協恭臺綱振肅尋改巡撫山西

於是旌循良黜貪暴定徭役平賦斂節驛傳禁和買憲度
肅然旣而巡歷邊塞增飭戰守之具拓老營堡城垣募軍
常守以代分番而邊屹然可恃戊戌四疏乞休乃復致仕
甲辰復用薦起總理河道陞刑部右侍郎改吏部右侍郎
太宰周公用喜得佐理翕然委重丁未陞南京都察院右
都御史復進南京兵部尙書參贊機務旣司畱筦振修百
廢封植基本議保靈長五上乞身勉畱皆溫語卒遂初服
益修舊業倡導來學居八年乙卯會地震卽世豈非地紀
絕而哲人萎邪有識者於是乎有蒼生之憾焉訃聞贈少

保賜諭祭諡恭簡云

朝邑志

吳講字進諭華陰人其先居縣之嶽鎮明初有諱敬甫者徙西楊村世農業多以產雄八傳而至講始以儒起家講生而夙悟弱冠補縣庠生淹洽績文學使者比士每置高等嘉靖乙卯戊午兩登名乙榜甲子薦賢書屢上禮闈不第庚辰署太平學訓丁丑擢知山東招遠縣甫三月丁父艱服除授山西萬泉無何又丁繼母艱後補四川梓潼講性樸直廉謹政尙寬和不務名譽初至招遠郡居停謀以賂爲人買直覺而峻却之亦不摘發其事至萬泉值比閩

之期而土瘠歲下民苦逋亡講多所減除於是襁屬歸業
隣民善之有願借寇者公復以近名力辭第質性悃愾無
赫赫聲故不獲乎上卒論調講翻然曰吾折落一官侵尋
踰者尙能雞肋此勞人乎遂自罷免歸明農力本以供賦
稅嘗曰士用則官舍則農軒冕襪襍曾足爲榮辱哉春秋

九十卒於家

華陰志

楊九澤字子德華陰人嘉靖乙酉舉於鄉戊戌進士授洪
洞知縣三年報政擢監察御史尋巡按兩浙會歲凶卽奏
請發帑賑之浙俗嫁娶尙奢又往往火葬九澤嚴戒使婚

禮從儉置義塚以葬貧者時倭寇沿海爲患疏請于漳州
置重臣兼督三省以防侵犯并于閩增設月港縣治制其
深入後以奏捷之誤謫爲縣丞歷陞睢陳兵備僉事賊施
尙兆餘黨未靖身督弁兵勦滅之未幾丁父憂歸嘉靖二
十三年乙卯地震死焉進階四品祀鄉賢父盡忠字恕齋
邑歲貢生性至孝五歲時嘗代父受祖父杖人皆異之持
已甚儉故九澤居官亦廉潔九澤嘗因宴同官具嘉饌飲
至漏下次日語人曰某仕宦閒筵夜飲慚負庭訓矣以九

澤官封山東道監察御史

華陰志

張士佩字玫父韓城人。生而奇穎。中嘉靖丙辰進士。授紹興推官。試得羅萬化、朱賡等數十人。教育於稽山書院。有大拜及魁天下者。同考鄉試。所得悉一時知名士。徵拜御史。每疏入。肅皇帝輒報可。所論皆當世急務。而三途並用。與衙門陞遷之議。尤爲當世所避。南大司馬克齋李公讀其疏。喟然曰。如此天下太平矣。又劾奏嚴世蕃之黨。罷龍文等。力逮治罪。天下快之。以內外艱。歸廬墓。五年。巡按山東。安戢遼左。流移日照。尹廉而才。以催科不及第。下等公破例拔薦。後爲名諫。議遷江右憲。副守嶺北。土寇葉楷作

亂劫司李賴萬璵爲質急則賴不可保公佯檄數賴不職
事遂還之因進兵平焉又有盜當三省交嘯聚幾百年公
建議設州於程鄉興寧安遠武平四縣間遂無叛者調晉
藩以汾水汎濫沒民田歲爲害乃築陂瀦水以時蓄洩反
成腴壤二千餘頃長憲齊魯逮章邱樓霞等墨吏按治之
羣吏肅然北境多盜公廉得主者二十餘家論如法而榜
其名盜竟絕跡爲晉藩左轄諸郡上折稅銀不啟封卽行
轉解省民財以巨萬歲得羨金萬餘悉登藉晉土多瘠爲
別三等輪賦疲邑賴之開府西蜀奉旨丈地力任勞怨得

伏田二十七萬餘頃糧地均平重賦者緣是得蘇蓋公於
晉嘗減武鄉沁源諸邑賦額於齊減魚台等邑馬價以故
三方皆尸祝云長官司土舍阿祭行萬金賄謀冒襲假助
糧以入公毅然白奴敢以是污我耶遂治其罪天全司土
舍揚時春以庶孽謀襲殺應襲者遂作亂公檄討之生擒
時春等斬之天全遂平定永寧宣撫司土婦奢世續爭印
讐殺董卜作亂於灌縣烏慮兵擾於烏蒙冉維屏固違戡
處皆一一討平成都兵當戍威茂監司發餉稍遲遂甲而
譁公闢門呼入衆尙操兵公曰此非副使所得主吾當給

之又曰譁者於軍法當杖遂杖其首者四十居數日得倡
亂六人斬於市衆皆股栗應變之智人以爲如宋張公詠
之在益州也召爲天官少宰仍申三途並用之法一意進
賢退不肖所見多與新冢宰左遷南大司徒稱疾乞致仕
久之起督倉場而公去志益決矣平生篤信理學與天臺
耿公研性命之理所著有洗心恒性中庸大指忠恕違道
不遠道自道成已成物夫焉有所倚復禮見學諸說心性
人心道心格物諸辯皆暢發前賢之旨他所輯有六書賦
洪武正韻玉鍵及達意稿四書端蒙錄畱臺類稿山東按

奏西蜀題奏韓城縣志諸書致仕家居逾二紀而終誥贈
太子少保致祭營兆域公嘗自謂吾居官不取贖鍰遷官
不用賄賂居鄉不行請託三事可對天日人以爲確其撫
蜀也江陵方在政府奇公才甚相倚重諸所設施從無掣
肘以故機宜動中公得盡所欲爲云歷官所餘俸悉推孤
姪及故舊親戚家無餘貲嘗引水鑿山開陶渠瘠地致可
藝稻梁數十頃築北園讀書其中性好學手不釋卷

薛亨字道行韓城人上世有兄弟三人出粟賑饑以義民
旌數傳至王父珉父三戒以亨貴贈山西提學僉事如生

時父母夢天門開卿雲奉日而墜於懷奇之六歲授書千
言成誦會苦大徭走之臨鎮設館胡家王父病執其手而
語之爾必歸吾骨首邱亭泣受命十六隸諸生籍家赤貧
讀書圓覺寺僧夙夜起鳴鐘必聞公書聲嘆曰卽吾黨苦
行不若是寒忘求衣餒忘求食箒燈忘焚其冠於路默誦
腹笥逢所知若不識或就而揖不變一語里人程公張公
見其文斂衽服之守梁公倅黃公都肄諸生目公秦士無
雙聞其未受室也屬縣令王公擇名門女而得衛氏爲具
六禮以婚辛酉用尙書舉秦第一人甫弱冠耳更十年成

進士授戶部主事督餉寧武徙內庫於外以示辟遠不義
設祁倅司出納故事餉賦金賦粟各半屬虜款冬戍河卒
夏復築隄請倍給餉或議加賦公不可裁甲馬芻秣之溢
額者畀之大司徒嘉其能著爲令改兵部武選司以父喪
歸服除除車駕司奉使犒邊道遷刑部員外郎尋擢山西
提學僉事教先德行而後文藝暇則登進諸生談經術且
晏不倦而以齋膳之羨置學田周士不給者以母喪歸子
婚有期緩之俟三年而遷葬王父如諾里人若隣邑士來
受業成名者甚衆服除除故官值大比士屢試不憚煩得

人爲盛所著晉學政核士錄晉學申諭原教錄四先生語
錄理學詩學海叢珠至今誦之遷山東少參督泰山香稅
屬歲祲以市粟賑饑市牛助耕無何遷楚副憲過家則秦
無年倍齊首以其祿爲宗人輸租而徐置義田義學義塚
賢愚僉受其益旣入楚所理屯鹽水利正經界繩兼併多
取商無闌出吏無橫斂民困大蘇勒石頌德其冬如京師
計吏所斥虎冠若而人寬小吏斗食以下不問已遷四川
參政治涪大修學宮而韓亦修學以百金來助爲士學申
諭川東雜議訓涪土民俗爲一變奉檄問播會楊應龍罪

銅之重慶獄中應龍詭以征倭自贖當事者飢法許之又
銅其子可棟而陰行金四千公家公以聞兩臺言會反覆
狀宜早爲備後數年播事潰裂卒如公言直指王公薦公
才當大任三年考最遷山西按察使治兵昌平尋徙汾州
疆宗間公來凜凜受夢東公增啤浚隍請陞州爲府以彈
壓之平亭獄數十百人已置學田養士爲五倫集要女經
閨範戶說之事具冀南雜議禁奢省刑條約及南澗集中
已遷河南右方伯攝行左事汰筦庫宿弊中丞張公薦於
朝而晉人議其後坐罷歸署所居堂曰敬忍此吾坐右銘

也家距河津一葦可杭慕薛文清之爲人於宋則師范文
正程明道伊川二先生嘗夢明道教之曰澄神心自靜心
正神益清已夢文正教之曰性定天機濶神凝物外清在
寧武夢中得句一廉束兩足平地亦能飛故所至不潤脂
膏梁三百金齊千金楚萬金棄之不顧父以諸子不就養
獨將母與俱朝暮上食西鄉而泣持喪絕酒肉之味苦由
三年事其兄若父兄欲析箸長跪而留之病則卜禱醫藥
不遺餘力輦之游太華元嶽以適志旣老以高年賜爵沒
而哭之哀不忍發其遺橐皮諸別室故舊一飯不忘報然

矢不爲居間有司疾惡如風而不宿怨做洛下香山與鄉先生賢者月再舉會以朴素退讓表正鄉閭體鴻大聲吐清暢方面美鬚髯寢疾邑令來侯披衣起論諸子問後事一無所答因問曰勤儉耕讀四言蔽之矣

韓城志

牛斗字應宿朝邑人甲戌進士以親垂白乞終養已除工部主事嘉靖初徙兵部武選司郎中世宗詔革先朝冒濫軍功傳陞帶俸武職無慮千數亡何冒濫者賄於當軸乃於詔書中開蚤緣之路被汰者釀金數萬遍賂柄事兵書力爲之地獨難於斗懷金千兩無門可入兵書欲斗爲委

曲難言之而令司務廳喻意斗執不從兵書不得已召斗於火房爲好言誘之曰此當國者意也吾與若爲之奈何斗曰朝廷初詔號稱聖明未幾輒欲反汗其何以示天下兵書曰彼柄政者欲之子但奉行何患無美遷斗曰壞國紀而博好官某不爲也兵書怒而斥之曰若老郎中也陞遠方郡守出張掖門適回而泣者有矣斗曰老先生戀戀富貴一旦失位不免飲泣若某素寒儒也罷官守窮願甘心何哭之爲兵書愈怒幾欲撲之而不得因移病不視事兵書令他人代署先汰革者復職如故斗以此無何出知

萊州與貴勢不合致其事而歸

朝邑志

王朝雍字仲和朝邑人郎中遷次子性至孝父以言事繫獄雍遍謁諸貴人叩頭求解膝至青腫初授嚴州府推官多所平反作理刑銘嘉靖改元應詔言事勸上勤學禮下節用恤民及革文臣子孫冒濫軍功者行縣不受餽遺自爲市菜和粥人謂之王青菜居五年陞澤州知州澤富饒庫人以羨金嘗之立置於法又榜示條約罷不便民者數事郡中憚服青羊山盜起檄朝雍紀功隨征勦已而軍敗陷賊中賊以仁德不忍加害諭以威信賊囚送出卒得賊

所據要害及相扇之情白當道曰伺險進兵兩省齊發使賊腹背受敵乃可逞也賊平如朝雍策始在賊中郡人共詣神祈禱比回日香煙四十里沿祠祭報其得人如此已進懷慶府同知澤人爲立法思碑更三郡操守益嚴監濟瀆神池之貨不隨俗窬取自潤巡撫徐公讚疏其賢陞南京戶部員外郎郎中山西按察司僉事卒於官

朝邑志

王朝濫字仲冕祖第三子丁丑進士初授三河知縣有權璫張銳坐東廠先是知縣青衣小帽謁銳私第跪而獻贄璫獨不往會銳以禮來冠服及門又不肯屈銳滋不悅邑

富民假銳勢影射差役貧者代辦濫清出之且按其罪以故銳大怒屬意當事欲罷濫官適銳有私人從旁解之曰縣君廉銳怒稍釋得調鹿邑鹿邑健訟濫爲文告諭民多感化沈邱盜起所在蹂躪濫繕城塹張疑兵爲備甚具寇至城下三日百計攻取而濫極力捍禦寇退而疾不可爲

矣病中遷宿州知州卒

朝邑志

范燧字以木邵陽人父棟邑學生封戶部郎中贈四川按察副使燧以嘉靖己未成進士時嚴嵩當國勢甚熾公絕不與通需次當選部屬嵩子世蕃使所親問欲何部蓋誘

之賄也公正色謝曰六曹皆王臣惟上命耳乃拜戶部湖
廣司主事泣事周慎稱能練樵崇文門稅核欺隱不避權
貴督淮倉罷商船橫徵後諸司郎缺兼攝三四篆事無滯
者於是當道者悉才公適漕運多阻滯命公督之應期至
陞四川按察司副使備兵川東公爲人恬澹清約守正不
阿而長於吏治川東山谷崇深多盜公至定約束禁邪淫
固城垣飭保甲盜不敢發又擒妖僧剪土豪雪冤獄川東
帖然稱頌凡四載報最以憂歸服闋應起或勸其一千江
陵可大用公笑謝曰面人乞官豈我素乎後歷官河南布

致司參政分守洛陽卒以剛正不合時爲小人所中傷引而退公天性孝友事祖母父母養盡歡喪葬盡禮與弟灼親愛特至居鄉以仁凡死喪婚姻周濟者甚衆修學宮以興文運而萬歷己卯壬午舉於鄉者六人邨前此所未有也子三垣堤垠俱有文譽吏才時人呼爲范氏三鳳云公墓在范家窪西

邨陽志

范垣字伯師邨陽人幼岐嶷穎慧登己卯賢書知山東高密縣事至迎刃解盡心愛民而嚴以御吏三月高密大治是時倭奴啟疆緣海騷動公募民兵分部伍明號令諭以

親上死長利器械習擊刺久之遂成勁旅修城濬壕更築
郭外崇墉申固隄防於是屹然稱巖邑焉旣而歲大稔乃
請發倉廩以賑之委授有方全活者萬有七千餘人公曰
大凶之後必有厲疫可無慮哉捐俸儲藥以待已而全活
者又不可勝計三年盜賊屏息荒土盡闢刑罰不施絃歌
比戶由是聲名動遠邇薦牘累十餘上而公恥事奔競乃
遷雲南大理府同知至卽署府事例歲貢金有樣金若干
歸之府公却之除其例土司之餽甚厚概謝之風多盜公
嚴保甲時巡輯飭衛所申守備數年中蘗苻無警土司負

喁者歸命百姓以寧兼之聽斷如神廉明之譽益著顧遷
爲王府長史上官俱太息公無愠色旣爲趙王長史王甚
重之未幾以老疾乞休卒於家公吏績不愧其父而篤於
倫常端方仁厚不佞不狎不輕喜怒不設城府又人之所
不可及者子銳鴻臚司序班性嗜古不樂爲帖括語遂棄
舉子業博涉經史工詩賦又嫻音律所著詩篇南北詞曲
多爲人傳誦孝友忠厚不墮家聲崇禎八年七月流寇犯
境所過燔掠無遺銳急趨家廟護主值賊騎突至被執不
屈一賊擲主地下銳大罵不絕遂遇害知縣范志懋請於

上官旌其門曰節孝雙全

邵陽志

范堤字叔防邵陽拔貢生博學工文章具用世才知山西岳陽縣扁其堂曰好惡同民於是緩征省刑導墾闢崇士習表孝義鋤姦慝數月頌聲大作平陽府推官楊某署其考曰清操堅如執玉長才利比發硌三十五屬之吏治惟先數千萬家之人生永賴乃逾年以疾沒士民巷哭罷市論者謂其文如曾子固品如王彥方政如鄭子產云

邵陽志

范垠字叔際邵陽拔貢生知伊陽縣伊陽故貧瘠公潔已緩征督耕開渠民用饒足又明敏善斷吏不得爲姦嚴保

甲戢盜賊久之稱樂土焉初參政之守河南也嘗賦澠水
清四章以自勗公書之座右爲銘又自揭一聯云潔已成
家貪愛一錢神鑒平心體國虐殘百姓天誅其泄任之初
值大荒人相食流離載道公招撫安集勸富民輸粟設粥
全活者甚衆又見野悉黃茅耒耜不入乃令訟者納茅根
以聽其理於是野盡闢則薪茅根爲甌甌甃城蝗起捕之
納斗蝗者予斗米民無饑而焚蝗卽以糞田其才畧多此
類五年遷絳州知州又補趙州陞湖廣黃州府同知未赴
任致仕歸伊陽爲建祠肖像又請於上官入之名宦祠祠

尙無一人公首列且生入焉民之感戴可知矣新志云公
行狀無存絳趙二州治績莫考特據伊陽治績爲之傳云
郟陽志

秦和郟陽人性孝友有子三人弟早卒遺一子尙幼和撫
之不異已子同居數十年家初貧後漸豐累貲鉅萬皆和
所經營者和老析產爲二一與弟子一與已子親族咸曰
汝家貲非祖父所遺也四子均分亦足矣今無乃過乎和
曰不然吾與弟同居弟不幸早亡其子與我同居卽兄弟
同居也旣同居又何論誰所經營乎卒兩分之迄今十餘

世子孫于餘人稱望族進士鎬其六世孫也

邵陽志

衛先範字象極韓城人自號檇櫟子父王道篤志理學卽著宗極論者公幼岐嶷不凡遭父喪哀毀踰節家酷貧讀書砥礪不少休賴仲兄先烈衣食之萬厯乙卯舉於鄉出新安呂忠節豫石先生之門先生夢五色雲擁一忠字大可竟天因得公卷己未成進士令太平革里長易帽例米歲二千餘石及富民紙價銀等弊百餘兩調繁襄陵攝篆臨汾又攝太平襄有河患公爲造浮梁民稱之曰衛公橋又加意作人譚經課藝名儒多出其門兩治民皆爲建生

祠乙丑擢吏部主事胥吏假印爲蠹公至首釐之以不附
魏璫力請假歸家居十二年非公不一字入邑門至地方
利病民生休戚則力爲陳說庚午乙亥間流寇迭至與邑
令萊陽左公議守禦設方畧動中機宜今所存守禦策問
皆公所作而諸官紳條答者是也時荒旱頻年公與左侯
議刻崇儉書以挽回之至賑貧醫病雖家無餘畱而日夕
施濟不少休偶染疫疾合邑老幼爲祈禱於神願以身代
者至數百人丁丑起考功轉文選嚴絕私交毅然以簡賢
爲己任特取汪公喬年爲督學左公懋第爲給事又起劉

公宗周陳公子莊等十餘人時有鐵板釘子之謠內瑞馬
化龍欲有所託公峻拒之遂以他事中傷左遷貧不能出
都涿鹿馮公贈以金始克抵里歸而教授生徒立龍門社
以課遠近諸生李賊入關公走河東山谷旋爲所繫時有
傳將授以官者公勺水不入口凡六日未幾追餉備極毒
刑從未出一祈憐語少閒則力病讀易而已會諸賊敗散
公始以殘年得歸居邑北三義莊究心易傳鼓琴嘯歌不
問家人產業嘗乘一疲驢布衣氈帽所過市里與野叟相
後先人不知其爲故吏部也年八十二終

韓城志

李朴字季白朝邑人性忠鯁敢言萬歷辛丑進士觀政吏部聞母病請假不俟報而行謫判高唐州起府推官歷彰德太原擢戶部主事管通州倉時朝士各立朋黨臺諫尤好相攻訐神宗春秋高不復視朝大臣郎署欲空朴不勝憤上人望幾空疏不報是時天下正賦多缺朴以爲缺賦由民貧民貧由稅璫爲害又東廠司李俊播虐鎖拿曹縣主簿甄志義拷求數千金朴先後上書極論皆不省朴每一疏出人爭傳誦前論人望一空羣小悚懼而朝廷曾無可否由是科道益無所忌後爲郎中復指名劾之疏奏滿

朝領動科道四十餘人交章辨攻朴復數疏力辨語侵閣
臣葉向高奉旨李朴出位妄言着部院看來說怨者改爲
議處咸欲死之值慈聖太后喪建言例在赦列遂得不死
歸方朴奏上時神宗名以瘋狗光宗在東宮每袖其疏及
卽位進太僕少卿起用光宗崩而朴亦以是年卒也著書
有調刁集雪亭集數卷祀於學宮晉中丞擲其主於地然
終不能革也孫育才

國朝康熙甲子舉人

朝邑志

王之宗字蓋甫又字心一朝邑人剛毅有大節萬歷辛丑

進士除知無極縣無極舊協隣驛後因道經業增設五馬
而協者如故之案力請罷之歲省三千餘金沿河兩岸鑿
千餘井灌田又教植柳桑爲鄉約六十餘所里社九十餘
學以宏教化調上谷慶雲陞大理左評事刑部主事首發
挺擊事挺擊者萬歷三十四年五月初四日酉時有男子
張差持棗木挺闖入慈慶宮擊傷守門官李鑿至殿前簷
下韓本用等縛付東華門指揮朱雄等奉旨着法司審問
劉廷元开詩教等以爲瘋顛之案值提牢訊得其情謂主
使者不可不究遂上疏論者譁於朝神宗不怡率太子面

諭百官立誅差及龐劉二璫寢其事事雖寢而由是陰得罪宮闈踰年竟削籍還家熹宗立以薦起原官請復三讐曰用藥通外挺擊言尤切至悉置不問屢陞刑部侍郎魏忠賢擅政與同志連疏論之而三案之禍及矣楊維垣承忠賢旨言其貪功冒進幾危國本奪誥命又言其先詐鄭國秦銀二萬追贓擬戍劉志選言戍未盡辜逮捕詔獄方欲置辨銅手披落二頤立斃獄中崇禎改元逆璫旣誅詔褒其忠乃復刑部侍郎子建斗以廕授戶部主事

朝邑志

姬文允字士昌華州人萬歷癸卯以春秋舉於鄉凡六上

春官乃以祿養謁選天啟二年授山東知滕縣至滕居三日而難作滕民什九從賊公徒步叫號授兵登陴不滿三百人比賊至纔數十人耳賊欲見之遂免胄示賊喻以大義賊弗從化以婉詞申以約誓賊竟弗從至晚積薪焚門以入公緋衣坐堂上嚼齒罵賊賊前裂其冠裳以銀鎗鎖之公大罵賊胡不速殺我賊顧不忍越三日不食賊勸之食不可勸之去又不可及防小疎私爲完印計並遺書使使者潛匿以出迺題詩壁間曰欲生義不可急死勢不能傍徨三日間誰云我偷生又曰殺賊無寸鐵罵賊見孤忠

從容就死難何謂非令終又曰效死亦是忠瞻雲總非孝
原爲及親仕一釜不能到題畢遂正衣冠北面拜者再以
謝無逃之義西面拜者再以謝罔極之恩投繯而死有門
役魏顯照乞棺于賊弗許乞布裹屍許之瘞于署之池側
父聞變奔赴二千里外發屍之日歷六月餘顏面如生合
滕士民咸以爲宜停櫬正堂以昭先靈署事者難之是晚
縣堂五楹俱焚衆胥詫爲公顯靈云後滕有扶乩者明謂
公下降批詩云不將鬼火耀庭中知我諒我付西風非靈
驗而何且公初舉孝廉時夢一金冠緋衣者呼公言曰吾

與爾同姓異日見爾汴橋再問冥然寤驚異之洎宰滕經
兗州有邀謁季路祠至則一如二十年夢中所見者訊其
地則汴橋也公惴惴者久之不越五日竟憤烈而終撫臣
趙公彥上其事熹宗嘉其節贈中憲大夫太僕寺少卿諭
祭一壇建祠秦魯兩地俾有司春秋祀焉封父母如滕令
秩廕一子入成均時公年四十有一葬於郡西郭之北繼

祠而宅焉

續華州志

劉士忠字純卿華州人大父璉以歲貢起家所稱豐川先
生爲遼東參軍父封公士忠髫髻時綽有成人風大父奇

之曰是兒異日必能高吾戶年十四得茂士賞采芹類水
從父讀書豐塔寺一日至漢史廢昌邑王父問曰當昭宣
間天久陰不雨夏侯勝何以卽知下謀上公什槩對曰儒
者言事必參衡于天人昌邑以淫亂霍子孟與故吏延年
等合謀幾隱隱動矣勝故合之以洪範曰皇之不極厥罰
常陰是豈以突而決耶子孟以不學致驚無足驚也父子
是大善之曰孺子可與論天下事矣益出先秦兩漢諸書
研味不輟以隆慶丁卯領鄉薦萬歷甲戌登進士授真定
李官三載考績晉江西道御史行部三晉摘諸豪宗不法

者會清文事起議者欲加賦復黃冊額士忠持不可曰額
徵田也田徵實也奈何羨虛羨而中民實禍乎賦得無加
四十餘萬者士忠力也昔之人邑誦毗諺至今不衰尋移
疾歸闕二年再按中州持三尺視三晉時益力計臣有欲
褻中州賦二萬有奇者士忠抗疏罷之亦如其爲晉人謀
也時上以天久陰霾感臺臣定下詔思所以當天心者士
忠莊誦三歎曰大哉王言遂條上五害一重折二盜寇三
惰農四慢令五宗室上覽色動辛卯復除按順天諸戚畹
勛貴相戒毋犯約束曰是日者并豫驄馬御史也士忠凡

三按部絳騶白簡丰采凜然而要歸於持大體時當計吏
推士忠臺長與銓憲長卿相可否藻鏡精明朝論倚重之
甲午晉順天府丞庚戌三月晉右僉都御史總理河道復

攝漕撫以禽倭功按臣勘奏特賜白金文綺旌厥勩諸若
沿河列障闢飭郵傳事事完整而未嘗於歲貢外行鍾官
一錢其訾省金糶無算而竟以三山口之役浸淫成疾疏
乞骸骨不報及疾小間猶力起闕皇陵檢運道矻矻自公
會廷推南廷尉命下間道歸六閱月而卒所著三巡奏議
大河志叙漕運奏疏并詩文行世

續華州志

王庭詩字言卿華州人少負異秉年十二補弟子員受知於李於麟督學年十六嘉靖辛酉舉於鄉年二十乙丑登進士初授內黃縣神明愛惠黃人至今尸祝識拔諸生黃吉士劉光祚後先甲第歷仕顯官咸以得士稱時王元美備兵魏博廉內黃政寓書李於麟稱不啻口於麟復書爲督學識公謂飛黃結驂人盡奇之何必卜樂哉不以自多而羨治內黃此其在內黃可槩見也遷禮部主事共事春曹有王敬美王和石孫月峯鄭崑岩諸人俱一時名流敬共爾位之餘賡咏迭和雅相友善後備兵濮上會江陵子

爲江陵修禱於泰山時直指諸公盡出陪獨庭詩不與焉
其生平氣節概如此分守海右掌臬汴臺藩宣荆楚剔歷
又十餘年所至有異蹟庭詩剛毅直方不屑隨時逐世好
而急難寬仁在邦家俱有惠聞如在宦釋孟縣劉太學之
冤案平尙進士之矜疑恤渭南陳遷客之旅喪識江夏段
給諫之伏櫪居家消東孝廉之積猜寬悍宗僕之詈口愛
禮族弟之佐庭誨之秀達倣結洛下綠野之社盟仁風高
致比比希踪所著長春圖稿秀巖閣詩行世

續華州志

王庭選字敬卿華州人年十七隆慶庚午舉於鄉越十年

萬歷庚辰年二十七登進士廷試策當上旨擢第一甲第
三名授翰林院編修丙戌分校禮闈所取多名士與修明
會典成晉修撰賜金幣病不能謝予告以歸會丁亥戊子
歲薦饑死骸枕藉庭課施繩蓆瘞之又捐穀五百餘石以
賑餓者全活甚衆告滿如京師復舊班記注起居管理誥
勅尋推經筵講官辛卯春疾復作罹大故馮文敏表墓之
辭謂游道日廣煦嫗取下相爲引重而真意蔑如悃欵惻
怛如公者而竟無年乎斯道也將亡矣其生平可概見云
庭課爲人坦夷真慤無匿心之辭無飾情之行而遇事則

委宛幹旋周規折矩曲當人意所謂義以爲質而禮行孫
出信成者備有之矣文法司馬子長詩法杜規後數十年
張見平侍御讀其稿云卽一小存笥若假之年并美矣蓋
祖其意有當哉著有廷對策松門稿左傳臆說十二家唐

詩頗解

續華州志

李爲芝字明瑞華州人登萬歷癸未進士四歲失怙恃育
於祖母公性至孝爲諸生時移居城內及遇寒食往鄉拜
掃覩塋域湫隘嘗泣曰人子於親生不能養死不能葬祭
無以成禮何以立於天地間哉遂負骸骨遷葬南郊輿論

稱爲孝子焉巡城御史楊公於爲芝歿後撰記有云如公

孝行可比聖門仲由歷官戶部員外遷九江郡守

續華州志

康惠民原名先民字念劬少警敏年十四爲邑諸生十六
食餼十八以春秋應萬歷戊子鄉薦事親色養俱備讀書
不求人知密爲省辰圖書所爲夜必錄授臨邑令是時中
官干政外吏以苛迫爲能災傷薦至老少散四方又內瑞
監祝滋擾朝命括搜藩田惠民持正省事徵科無累獄訟
無冤民得守廬井焉鄰民訟者紆道來質偶過鄰境有賣
娠婦者夫無子痛哭不能決惠民倒囊贖之異時夫婦抱

子叩階下以繼母憂歸臨邑老幼遮泣不能釋抵家著春

秋左翼泰昌元年卒臨邑祀名宦祠邵陽祠鄉賢祠

邵陽志

雷翀字翔宇幼穎異家貧不能讀書有李翁者教授里中
偶爲訓解句讀卽領悟翁異之令受業朞月文名大震補
博士弟子員試輒冠其曹萬歷己酉舉於鄉益篤志於學
歷榆次清苑豐潤教諭澤州學正遷絳州知州多惠政歲
饑人相食力請蠲租自捐俸煮粥賑之不足盡家粟千餘
石輓舟而上濟之全活者數萬人旱刺指血爲文以禱雨
立降火拜禱之頓熄時寇盜充斥戍卒爲民害公別建營

房居之嚴約束民弗擾而設守備利兵刃儲硝黃精火器
民恃以無恐公爲人仁厚器達人有善必揚之有難必救
焉綽有憂樂同民之意初爲廣文力作人才多所成就其
涖絳絳科甲寥寥堪輿氏謂城南汾流不利公立召役修
之忽大風起一夜湧沙如環帶而科名遂盛又嘗以歲荒
傾橐金徧濟貧士之急者故士民頌之至今不衰及罷官
家居二十餘年孜孜讀書爲善不倦著述甚富施德於鄉
里者甚廣凡貧不能娶爲畢其婚姻者數十人歲荒有以
半值鬻產於公者公如其值予之積穀四千石盡出以給

其里人而知絳州時又嘗捐貲還濟郟邑之饑遺火藥數千觔爲禦侮備後果有寇至力攻十七日不能下賴此有以禦之也公年八十有六而卒墓在天柱山南有二女皆苦節終其身見本傳一妾從公死見雜記孫學謙別有傳

守謙見選舉

郟陽志

康國相字芝函郟陽人弱冠負文名萬歷戊午經元崇禎時上封事兵部尙書梁廷棟召與語奇之歎爲文海武庫顧不能用後授玉田知縣復知藁城罷歸晚年學益力文益離奇不測著述甚多遭寇亂燬於兵或傳其畫像記曰

客爲予圖像情鬱鬱不舒予取琵琶爲彈一調猶未暢援
琴而鼓之奏客啻一曲客釋然作而曰美哉融融乎公坐
危形舒色愉神澄是可像已旣成僉曰像予曰像像我耳
異時無我誰像耶且異時見可見之像能見不可見之我
耶固知今謂像像我也異時謂我像像也謂像像我像猶
像也謂我像像像卽我矣是則我亡而像能不亡像之不
亡我常存已而像能終不亡也耶

邵陽志

張養才字汝才同州人萬歷中進士儀度修偉白晳美髯
爲行人司行人三奉使藩國不受餽遺久之轉祠部主事

遷主客員外提督會同二館劄蠹拊夷請託不行已改吏
部歷四司秉公佐銓爲冢宰倚任晉驗封郎中以省覲不
拜踰年大計卽家拜考功疏辭不允入朝月餘遭母喪服
竟召典銓選時黨比相糺有借事波及者乃移病歸越七
載復起太常少卿尋卒於位養才居家孝友溫厚歷官清
謹有識度不激不隨在銓曹更以鑒操稱

大荔志

馬樸字敦若同州人萬歷丙子舉人授景州守勤幹嚴明
權使工監恣橫景民被逮株連數百大譁樸爲數稅使罪
諭譁民解去順永張監議加稅河間上官已許樸格不行

歲荒疫煮粥醫病安流移贖子女全活甚衆以憂去服闋
補易州擢襄陽守積穀備荒倉庾完實復理古塘百二十
區備南漳堰得腴田若干頃革襄樊均州光化雜稅後遷

滇憲告歸

大荔志

馬協字恭甫同州人方嚴剛果少秉清約服勤茹淡不妄
交遊萬歷己卯舉省試丙戌銓伏羌學諭士慶人師歷知
廣宗新鄭禹州同知鳳陽入爲刑部員外郎出守辰州服
官幾三十年始終潔已勤民疆直自遂在廣宗時旁邑有
藉要人力求減賦以加鄰封者挺然力陳其不可新鄭任

滿以風政薦知禹州時禹政做人玩道十餘年賦官亦久
無明陟協度地均徭法行自豪右賦完政舉改官之日奔
訴泣畱者千計直指爲奏請加銜不報至鳳陽一署府六
署穎壽泗等州興利除患不以代庖少忽居八年內陟時
年已七十勵精過少壯惟鬚髮爲白或謂宜染而入協曰
吾生平不作僞事寧能飾貌事人郎署皆服其品辰陽軍
民糧賦多失平協差等而均之又罷諸所不便且多修舉
丙辰計竣上疏乞休銓部健其才力寢令還治已自分刑
郎老免協明習世務世號通今作令時奉部教條上二十

七事皆關治平至計多見採納居不問家而每以朝政得失爲念絕干請而軫鄉里疾苦嘗清丁地省徭賦千六百餘金年八十三卒

大荔志

王宏祖同州人萬歷庚子舉於鄉庚戌成進士任河南開封司理一反苛察慘切做政郡人戴之臺使薦入爲兵曹去之日郡中立生祠勒石紀遺愛歷陞天津寧武遵化密雲兵備等道河南按察使性戇直崇禎四年以遷本省布政入覲廷忤中官鄧希詔被斥儀曹周鑑論救不允遂致仕其至性天成解組後定省彌篤邑西北隅舊有秦長城

長十里廣二里秦築以塹洛者歷久傾圯漸可耕復居民
因緣侵佔訟興宏祖議附近貧民墾種造冊存庠衆皆服
家居課子孫文經武緯皆有成立孫師誥中順治甲午舉
人諸弟似祖振祖耀祖皆能積儉好施崇禎辛巳歲大荒
斗粟值價三千人相食振祖以守戎出粟全活甚衆耀祖
官中書後遇闖賊亂棄家隱浮圖終焉

入荔志

路車字公御澄城人豐潤主簿金孫嘉靖辛酉舉人時方
弱冠性至孝處異母弟無間言澹泊寡營終身無姬侍銓
試第一除四川威州知州州故姜維地羌夷叛順靡常車

以信義柔綏九年無敢犯境松潘反側當道借爲贊畫旋
卽削平天語勞之云飲至明軍旋酬勲錫武功陞敘州府
同知卒於官萬歷間威州祀名宦天啟間祀鄉賢

澄城志

馬自渭字應周號金川東昌府通判徐子萬歷丁丑選貢
兄自河字龍川保安州吏目自渭幼慧博極羣書文戰數
不利庚寅謁選得直隸青縣知縣潞王之國過青供用羨
金百數自渭請於督學賑貧生曹志學吉申錫等毫無所
私勘拯水災應發官廩府以備倭故持議不決自渭曰我
民父母也奈何坐視其死法古矯詔意賑之達之直指直

指弗罪也在青四載惠政多端以正忤鹽運使阮尙賓坐
他事中之量移唐府審理不就而歸庚子三月卒年五十
六子鷗字光川例貢宣城縣縣丞承天衛經歷光祿寺署

丞
澄城志

王之良字虞卿以陝之華陰人故號隣華父可軒爲華名
儒生丈夫子四而之良最幼早孤稍長心竊自傷爲亢宗
計惟有力學補博士弟子員有聲矣然志不欲以文人自
居鄉先生馮恭定臬比談道則從之遊最久馮門數千人
獨嘖嘖稱華下王生之學一以考亭傳註爲宗間出新意

考諸不謬馮先生亦自以王生善學也已酉舉於鄉六上
春官而後登乙丑榜授中書舍人中書故清秘職地閒無
事得以其暇討究經世大畧時方波靡泊然無所附三乞
休里居之日多六年秩滿擢授御史而後乃發摠其所自
得也首上封事謂滅賊本計在練民兵恤民隱擇有司而
歸之振紀綱訓節義上嘉納之擇有司一議再疏申明以
爲守令視監司監司視撫按夫監司不職撫按必糾之撫
按不職臺省必糾之而天下治鑿鑿乎言之也然非但能
言之實能行之所至必著聲績其視北城北城故兼九門

巇法者則請責兵馬及州縣嚴私犯之禁請長蘆運司發引務足額繳銷不盡罰治鹽官歲當大計吏則請密計典以所核佐貳首領之當否爲州縣殿最以所核州縣之當否爲撫按殿最大畧與所言擇有司相表裏糾衰庸懲棧之臣則有疏稱延綏撫臣洪承疇可任奏事仍簡道臣接濟本色則有疏請治軍丁之禦人門者其視太倉及皇城皆有所清釐其按畿南也崇儉約蠲贖緩振疑獄彈墨吏劾兇弁丰裁截然而於邊餉郵政軍器軍需尤覈與保撫酌定標營經制及新兵鎮兵額餉動中機宜凡所言朝上

夕下而是時萊寇熾之良則發兵援勦叙功賜金帛尋賜
敕予階贈其所自出如之良官其從畿輔還視經營則發
僞弁之因姦殺人者而大糾故縱罪人之坊官比熱審時
衣冠頗多纍囚則疏請解網以迓天庥而弭天災得旨允
行時論美之其理齷長蘆則請遴甲科轉運而又謂運司
所藉以行鹽在引目南計部所馮以關引在邊鎮之勘合
夫倉鈔無倉勘則無引而商不行鹽課誦矣引到渥則行
鹽遲而徵收餘沒課愈誦矣又嘗核順義延綏五州縣所
溢鹽額皆在新增之數不宜復議加課爭之力而最後則

有糾治訛棍之事訛棍者奸人買大成輩及金吾陳寵倚
厥衛爲綫索所嚇取諸物以鉅萬計莫敢誰何者也請於
朝正厥辜通國快之諸所舉劾務當加盧象昇張瑋薦贖
之炳炳者所捐助協濟尤多旣已佐國不厲商談者稱之
朝廷爲晉一級賞銀十兩其入掌河南道則糾察凜然請
發帑賑三秦請修華邑磚城桑土之計周焉積資七年延
命擢之良回寺少卿會因寄養馬阻不至京營缺額而鎮
臣入援索馬亟之良則悉心應之無廢事以守門勞加俸
一級贛撫缺帝俞延推用之良往則拜疏稱伏莽遺奸時

思蠢動控御彈壓責任非輕得旨多倚任語楚臨監桂陽諸處徇燹土寇相煽起衡州桂藩震焉而衡故界江省至則急檄守巡防勦又設支英三峯中石橫岡東桃諸營設置官伍區畫糧餉議設營兵於石城鷺公隘皆疏以聞粵東樂昌寇起急遣材官往已而楚有野牛峒天堂坪之捷粵有安遠之捷桂東堡官林起鳳反率鄧扶黃鐘四黨攻縣城之良下令撫安之楚寇出沒郴衡間贛營兵擊之賊鋒挫於是白蠟橋白沙灘之捷鉛山妖人張普微之黨及南豐封家山之妖各蜂起之良遣兵分擊之兩賊勢合

與江撫謀合擊之而分兵衛益藩於建昌其法用腹背夾擊亦務解黨自新已而有封山之捷楚寇侵韶連樂昌我兵力戰於是有韶之捷先是之良實主四省會勦之議已得旨則檄楚撫爲主兵嚮導一切兵機之良爲方畧而閩粵督撫協應之大抵以贛供贛以楚濟贛軍興無缺士馬飽騰而又鼓厲多方部伍暇整用能周防翦翼深入窮巢六月出師九月奏凱固賴鄰境一心策力輻輳而功爲優矣大參林某稱其勲宜配王文成憲副郭某以爲當在臨淮贊皇二李間而桂藩疏有云選將練兵銳氣落敵人之

膽同心叶力奇謀成底定之勲蓋實錄也維天子以爲紆
朕南顧憂褒悅有加己卯歲將杪之良趣戒嚴入衛有詔
止之則循例折餉而自江省班師疏詞慷慨義形於色仍
乞飭武臣從新料理修牆堡練將士蓄義勇招豪傑休養
培持恤存弔亡則可轉危爲安所言皆至計朝議聽之庚
辰恩詔階正四品榮及所生以憊乞休不允部頒保民四
事全書奉行者多具文之良則設誠致行犁然實効或倚
山築城或平寨爲縣天險屹然利器充物積穀至三十四
萬有奇而虔爲雄鎮矣辛巳連州楊山猺賊起奉旨會勦

之良則以虔兵居軍峒拒排獠之出入斷其魚鹽獠可坐
困繇是大破賊是年上復晉一級加從三品服俸蓋前後
晉級賜銀幣者三賜金扇銀扇車扇者各一爲邇來疆吏
所希有焉而南右司馬之命下矣在虔六載凡設營兵清
鹽政闢河道立義倉賑飢民所全活以萬萬計置學田修
文廟勸廉泉書院而文教聿興虔之人口祝不忘而之良
已病矣請朝乞骸骨報可道經楚之光化遂不起蓋積勞
所致云虔之人聞而巷哭士大夫相與啼於朝鄉人相與
咨於里有司彙勞績援故事以請得旨凡所以榮哀之典

備焉之良生而頎頎性寬和無城府尤敦彝倫逮事其大
父孝養備至事諸父以下惟謹嘗讓所居宅於其叔兄鄉
人義之夫婦相莊迄老不渝其教子也以義方其教兄弟
之子如子有陳氏孤者其彌甥也卵翼之爲求婚宗族之
待以舉火者若而人里黨之待以無飢乏者若而人蠲租
棧券者若而人里之不逞有短長之者置弗較生平不言
人過善擇交尤好獎成後進相與讀書談道泊如也淵源
所自蓋有得於馮先生之教哉其與夫隨世就功名者遠
矣所著有西臺按巡罔政諸題稿撫虔奏議勦妖勦寇兵

食志援北節畧晉州志畧東游詩藏於家元配張累封恭
人丈夫子六人吾所識者宏學宏嘉皆佳士贊曰於戲人
可不知學哉吾與司馬交有年矣觀其氣象深重其志抑
然嘗自下者有才不自炫其才斯學之效矣終立功名爲
國寶臣有以夫不然今天下所少者非才也

華陰志

盧拱極字容甫邵陽人秉資奇傑嗜學博覽爲文與扶理
寤與三原溫恭毅公純相友善溫公嘗稱之曰盧君之文
可與定性書並傳其見重如此性端嚴不苟舉德行者九
隆慶時應首貢讓於同學生任守成守成者孝子也鄉里

稱之萬歷八年乃貢官鐵嶺衛經歷遷韓王府審理正告
歸子巨寔亦有文名學博而精爲文才氣橫溢性剛介好
禮以貢爲惠州府訓導又爲諸城訓導能世其家學云

陽志

楊呈秀字實甫華陰人漢太尉震之裔居縣治西郭萬歷
三十七年己酉舉於鄉庚戌聯捷成進士性剛毅負義歷
仕長山太谷靈壽棗強縣令入爲戶部主事擢郎中授順
慶府知府所至惠政逮下而持已不撓嘗有咏懷詩云愛
民親若子執法定於山之句可以徵其梗概矣卒以忤權

貴罷歸崇禎初關中盜起所在殘破呈秀憤官弁怯懦不能抵禦於是募結鄉勇得數千人日加操練賊來身親督率多所殺戮地方賴以保全崇禎七年流寇大至偕弟呈芳迎戰於縣西二十里不勝或勸之退叱曰丈夫受國恩臨難致死分也豈可以身不在位縮首偷生遂大呼入陣力竭被執憤罵不屈賊怒磔殺之呈芳字泗源體貌魁梧性篤孝友見兄被執泣曰兄亡弟豈獨存遂大叫揮刀入賊營橫戰至暮身帶重傷猶斬殺數十人及項將斷呼兄之聲不絕御史傅永諄具以事聞贈光祿寺少卿賜祭葬

仍勅建雙烈祠以祀之

華陰志

陳嗣虞華陰人戶部郎中諫子字允若號述敬萬歷庚子鄉試以經元舉初任山西屯留知縣擢江南高郵州牧因事降補河南內鄉知縣性沉靜廉潔一介不苟旣而謝政歸里杜門默處惟以墳籍自娛崇禎十六年闖寇破潼關旋陷西安僞檄督鄉紳輸餉名在牘中遂慷慨投渭水而死有司以聞朝命祀於鄉賢其居官也以清仁著高郵內鄉各於本邑各宦祠置主祀焉

華陰志

韓一良字象儒澄城人萬歷己未進士高祖泰累出粟濟

鄉里曾祖志緣祖春陽世有積德父逢操行廉平尤嚴督
課一良生而厚重質訥清正有執讀書喜體會不事記誦
爲文如其人鄉舉時年二十四卒牘請託痛絕不爲五上
公車始提禮闈又三年對策大廷選陳畱縣知縣矢諸天
日不以民間一錢自潤陳畱古有莘野濱河砂壤土濡民
貧士窳一良教稼穡立學校修元聖祠爲勸農歌士民翕
然有頌句云花城循吏廉平少二百年來無此官時瑞燄
薰灼逆祠徧天下仕豫者爭捐重資冀一錄名獨一良若
罔聞知任額派檄催終不一應再考卓異七年不調尋以

公論難混推清官第一崇正元年戊辰授戶科給事中卽
極言文官愛錢陋習帝嘉納之召對平臺奉有破格優擢
風勵有位之旨超擢右僉都御史時思皇新政求治太急
索奏數上內外股栗中忌者於御前諷令指名倉卒忤旨
再疏得嚴旨卽策蹇歸里棲遲午西寺鑿土室於灰條陂
谷中有遯窟說見藝文足跡不履城市僮僕產業宅第一
無改於諸生時角巾布袍非素識者不知其爲給練也海
內重其名起用之章母慮數十上終不起十二年己卯卒
於家年止六十子姓苦貧至不能治喪具蓋晚近以來所

罕覩也

澄城志

衛景琰字帶黃韓城人天啟壬戌進士性至孝母病侍湯藥目不交睫者四閱月任雒陽推官執法不阿峻絕苞苴杖斃土豪衙蠹無算直聲大震授山西道監察御史首劾閣臣周延儒及銓臣曾楚卿救工曹靖科元等按畿輔不避權貴丁艱補河南道御史巡太倉痛革陋規曹璫化淳有所求咤不顧樞臣楊嗣昌議加勦餉公抗疏直斥之謂天下安危視百姓利病今百姓方病奈何以加征益之病省臺王績燦吳執御吳彥芳俱建言被謫公疏請召還弗

省傅朝佑李如燦數溫體仁罪上怒下獄公力爲訟寃會
召對復極言二臣從國家起見願赦出以作敢言之氣上
怒甚罪幾不測公侃侃自如尋調行人司正遷尙寶司再
遷大理丞晉少卿平反大獄二十餘當是時公資望隆甚
例當京卿會周再相當事呵其意出爲大同巡撫潔已束
下興利除害厲兵秣馬裁缺丁鑄火器戢豪宗戒貪吏虔
禱祈廣賑濟雲人感頌甲申二月李自成東犯太原督臣
王繼謀望風遁公嚴師厲衆布置戰守法議遣重兵扼鴈
門險鎮臣姜瓖觀望不前及寧武告急公檄催援甚力瓖

曰非汎地何公憤然曰國勢至此尙何論汎地耶同舟共濟正在此時傾橐得九百五十金犒激標丁將親出師奉爲瓌等所沮不果三月一日賊報至公方出死戰而鎮臣瓌從內變賊遂入城擁公至賊營賊衆叱公跪公不顧向東南踞坐大呼皇上而哭自成善謂曰我米脂一民耳今日至此天命可知爾真好官爾降仍用爾撫大同公瞑目曰吾繫君組綬仗君節旄期滅爾朝食焉有從爾作賊之理賊引公出顧見姜瓌曰賊奴賣我爾朝盟而夕肯上帝必殺爾瓌掩面却退賊黨羣勸公少委曲公嚼齒奮罵不

已越三日復擁見賊自成曰爾真忠臣我且驛乘送爾還家公曰國破何家可歸爾速殺我自成曰我必不殺爾公奮起大罵以頭觸階石血淋漓被面絕而復甦賊悚然命掖公出公仍大聲痛罵賊瓌黨愧羞甚率不能語然終不敢加害是時公不食已數日矣而生氣嶽嶽竟不死初六日公行至海會寺南向痛哭且拜曰臣失守封疆死不盡罪願爲厲鬼以報呼二子德祇德敏訣繼母畢於觀音大士殿前沐浴正冠帶自經死死後自成嗟歎者久之給五十金遣人護其喪送還家其從弟景朝葬之蓋忠義之感

動如此公壬戌讀禮時從大司空馮恭定公學稱高弟子
仕雒爲豫撫范公景文所器重庚午分試山東首拔左公
懋第在臺中程司農公我祥稱爲真御史在大同與朱公
家仕交莫逆皆同殉難蓋師友淵源有自也事聞贈兵部
尙書諡忠毅公長身而黑色性剛嚴不可犯人因以黑爲

號云

韓城志

衛引文字紫岫韓城人生而器宇超越英碩非常庚午舉
人辛未進士出陳明卿李曉湘二先生之門授庶常晉編
修國學司業春坊中允諭德侍講經筵己卯典試越中得

人最盛陸公培葛公世振其尤著也時流寇四起海內騷然公方在家居十六年冬李自成破西安全秦瓦解公星夜赴京師慟哭上前言西土之危將延社稷次第上五疏具陳禦寇方畧且捐家資以助軍需得三千金上召見溫旨慰勞公哭陳勦寇之謀召諸將翼衛王室有詔褒勞未及施行而神京失守公薤除鬚髮被緇衣不肯臣伏賊切齒甚嚴加慘刑瀕死不屈手書寄其子延齡曰吾削去鬚髮不能卽死罪也兒唯讀書以繼吾志耳餘無所言已而乘間南奔時大學士史公可法奉命督師開府維揚興平

伯高傑節鎮淮南公以僧服入城史見公來喜甚卽疏公
以左春坊左諭德兼兵科給事中監興平軍西征至開封
諸故將之不降逆賊者兵無所歸多觀望公以忠義禍福
招諭聲振河洛兵日以衆適馬士英忌興平威望恐其成
功故促入秦欲以死之公以興平頗恃其勇武不爲賊備
屢書相戒而興平恬不爲意未幾遂羅許定國之刃兵大
潰公駐歸德閣部復以少司馬爲公請遂奉命總師共守
揚州無何大清兵至揚州城破閣部自殺公不知存亡或
云投水死又謂歿於亂兵又謂以黃冠遜去人尙有於嵩

洛間見之者著有館閣試草編纂六朝章奏武經七書六

子全書

韓城志

衛楨固字屏君韓城人少負奇氣性孝友而喜談兵畱心世務崇正癸酉舉人甲戌進士授開封推官承平日久時流寇剽劫梁宋間民不知兵驚惶奔走數十里不得至城邑多遭殺掠公議築西關城處之間以事經南陽汝寧河南諸府皆量其地宜城者勸民修築且出俸金助之旣成呼爲衛公城又舉城守事宜十三則奏記上官上官奇其才凡有警檄公與謀公戎服據鞍一日夜率行數百里按

視城壘修守禦所過扼塞險易悉一一識之以故賊不能
犯而執法如山判決如神丰裁嚴峻有衛青天之稱時流
寇猖狂督撫以李自成羅汝才故欲盡驅西人出城商旅
之在開封者不啻數千百將罹死地公抗言若是則推官
應先去以推官陝人也事遂止所全活甚衆辛巳以卓異
徵召對中左門力言今天下民窮半以兵半以歲諸臣惟
戮力勦寇寇平則無殺掠之慘時和年豐而足用故平寇
爲足國第一要務擢雲南道監察御史首劾中樞玩寇督
鎮戰守援兵入城又謂中州形勢宜分兵萬人爲二營一

駐襄城應南陽一駐陳州應汝寧以爲守汴計次年巡按畿南真定諸郡數請蠲逋賦恤饑饉又請正驕兵悍將之罪請革津遼米豆及俵馬之害又數檄沿河州縣安輯河南民之避寇者全活數十萬人事聞再畱巡按一年十七年春賊逼京師李建泰師出命楨固監軍事割京營三百兵隸之行至真定昌平失守焚十二陵享殿欲還軍救之命固守良鄉涿州都城陷疾趨保定行至大石橋遇賊數萬騎與戰射傷賊甚多賊少却復益兵圍之公突圍出投井井水淺不死爲賊所執賊敗公不知所終

張春字景和同州人萬歷庚子舉人任山東堂邑縣以異
等擢刑部主事時東事棘廷議春可任封疆授山東按察
僉事永平兵備援錦州有功陞參政錫蟒衣尋中讒降調
永灤四郡陷春前議皆驗召之率子弟舊義勇馳赴復四
郡錄功見忌於權樞告歸再以太僕少卿起通鎮監軍會
統軍祖大壽師潰急調春永平一時奸撫懦帥合謀全遁
春率所部來援血戰三日孤軍力盡被執求死不得偕於
僧舍足不履戶外居十年不易試脅以劍卽倒領趨迎後
遂不食死衣領中得不二歌一首初有同里傳言春夫人

翟氏聞春陷策其必死囑家人曰公請簡朝廷我婦人當
殉地下曰公未死奈何訃至訃未晚翟歎曰若輩安知公
陷卽我死時遂自經死子伸叩請出關負父骸歸俱另傳
徐殷字希湯朝邑人萬歷庚戌進士宰河南商水縣有惠
政以病告歸躬德行仁鄉里化之崇禎初流賊四起殷捐
粟五百石獨築一堡練鄉兵五百人保護一方八年七月
十一日賊掠朝邑境殷率子諸生鷺姪舉人鵬督鄉兵堵
截至十里外奮勇殺賊數百賊遁去次日賊數萬擁至殷
兵少不敵被執罵賊曰鼠輩敢爾朝廷何負於鼠輩而敢

爾賊榜掠之索金帛殷罵愈甚鷺以身翼父向賊衆匍匐
哀泣舉刀自向願代父死賊不聽鵬怒突起奪賊刀刺賊
賊共砍之遂皆死賊各咋舌呼爲義士或稱孝子孝子焉
劉長庚同州諸生慷慨有氣節崇禎末李自成蹂躪秦關
長庚挺身誓衆固守城圍繼聞會城陷遊騎且薄州衆皆
奔散長庚仰天歎曰此草莽臣委命之日也遂謁孔子廟
焚衣冠次邀族黨於家指割地建祠以祀先餘備烝嘗衆
方勉勸勿死長庚不聽願其妻曰吾乏嗣納妾幸生二子
宗祧可繼善撫之死後葬我於讀書樓下復謂妾雷爾將

奈何雷慨然言願從侍於地下長庚拜謝引至樓曰此吾平生修習之所天地鬼神共鑒在茲遂手刃妾並稚女徐自經死一時觀者如堵莫不垂淚臨命有訣詞曰頭戴朝延儒冠二十六年當國破家亡無尺寸補而又隱忍不死臣僕他人閉戶十六年所學何事吾不忍也吾志決矣雖匹夫之死無關宗社成敗吾盡吾心耳所遺寡婦孤兒萬死一生其憐恤提攜是在仁人君子也更賦詩一首載藝

文
大荔志

李衍枝字寬中同州人真定知府元吉之長子十二歲入

州學中崇禎十四年鄉試舉人十五年八月公車歸值賊
李自成僭號西安括各府在籍紳士往受職至則徵餉無
餉者囚而加刑是時衍枝辟地蒲城之勝山爲僞官偵知
招之衍枝自樓投地幾死衆昇之行至西安與蒲城王御
史湛白澄城孫兵備弼明同押入東二府東二府者僞權
將軍劉宗敏所居本秦藩邸也僞官以衍枝知府子注餉
三萬衍枝怒髮瞑目罵之並罵同囚之乞哀者家人持金
來視衍枝曰我豈求生於賊手者哉急持歸勿溷我事遂
膺慘刑死人呼之曰烈孝廉

大荔志

國朝

劉孝子者失其名亦未詳其世系以純孝故人咸以孝子呼之孝子生於明末爲朝邑龍門村人父母相繼歿時土賊所在多有營葬後卽結廬墓側卒無他患嘗種瓜自給一夕陰晦邑令某過其處見燈火趨之問知爲孝子廬使召之則辭弗見令益嘉尙固謁且許請旌則又辭弗應孝子凡廬墓四年其瓜輒異常大數倍每日夕有羣鳥集塋樹皆滿人謂孝之所感云

朝人新冊

王宏撰字文修華陰人祖大受邑廩生贈嘉議大夫都察

院右僉都御史祀鄉賢父之良明進士歷官巡撫南贛晉
陞南京兵部右侍郎贈嘉議大夫都察院右都御史宏撰
幼嗣於季父之祚實司馬第五子也生而穎奇風儀雋整
初肄童子業卽嗜詩書如飲食司馬官京師宏撰從侍郎
中有翩翩公子之目司馬授以制科文匪所好也私抄錄
左國史漢及歷代詩古文辭沉酣不輟迨歸試於督學使
者卽補邑學弟子員再以高等食廩餼家旣豐性復瀟曠
喜與當時諸名士游且豪於聲妓花晨月夕攜杯榼偕良
朋挈昆仲倚石臨流微奇闕韻加以翠黛雙鬟競陳肉竹

風流儒雅見者謂烏衣諸俊好音未泯卽宏撰亦以爲吾
家螭虎法護不我過也崇禎十五年司馬病卒越明年十
月逆闖李自成破潼關而西賊騎充斥焚劫騷然奉祖母
與母避難山谷未幾全陝陷沒逆闖籍繫縉紳考索輸金
家在籍中兄弟畏不敢出宏撰曰不出禍立至矣遂挺身
入長安賊營爲之陳說大義慷慨激昂賊不能屈亦不忍
加刃詭與約翰而還屏居於小漲村之別墅順治七年土
寇竊發遺賫掠殆盡乃縱游之淮陰抵建康至吳門與
江左高士畱連詩酒越歲而歸適副使睢陽湯文正公斌

駐節潼關造廬訂文章道義之交中丞賈漢復聞其名聘
纂陝西通志并命子壻受業中丞入都邀之偕行數載始
旋里結屋華麓單心洛閩之學而尤邃於易以其餘爲詩
歌古文清健高超一時三輔隱賢莫不趨赴華陰之市所
與之切劑者朝邑王建常李楷蓋屋李某富平李因篤華
州東蔭商渭南南廷鉉皆關中名流而崑山顧炎武入關
來訪宏撰分宅館之當時碩儒偉彥萃茲華封羣依宏撰
爲居停主康熙十七年

詔徵博學鴻辭之士宏撰列於薦剡累辭不允至都寓吳

天寺會病乞不入試閉戶古剎足不履顯者之門而大學
士益都馮公溥雅重其品藝介人求文司寇新城王士正
編修長洲汪琬侍講宣城施閏章等莫不單車就舍把臂
訂交病愈卽返二十四年丙寅再爲江南遊挽留者皆績
學老蒼頗不好虛浮之士有忌其名者從而毀之淡如也
郊是十年乃歸而息老於獨鶴亭康熙四十一年壬辰卒
於家年八十一歲門人私謚貞文宏撰襲司馬之業富於
挿架金石文字率多舊榻故兼善隸草書具得其家將軍
大令宗法著述具載經籍志子宜輔拔貢生海州同知

郭嶷然字因之一字青岑朝邑人舉順治乙酉鄉試教諭
交城遷知閩清縣會鄉試同考府推官屬其私人以千金
執不可推官怒伺其過不得乃謝補清江瀕海多盜逼城
下守禦有方親登埤諭以信義卽時引退民與鄰邑持刀
爭界諭以蒲朝禍敗其事遂息以憂歸再補昭化有女子
爲盜主交通半天下前令皆先往致敬乃得相安至是吏
以故事白嶷然執不肯亡何女子來謁偉岸桀黠不可御
嶷然怒猝捕下獄募民有訟者旣盈案卽斃之獄而臺司
大吏各爲關說已無及其黨震散卒亦無他其餘殘民寥

寥御之如家人教以耕織爲製其器地產金有類狗頭者
民得之爭以獻歎曰嗜此者真狗頭也解官後囊無一物

云 朝邑志

劉璽字爾符別號三峯朝邑人順治丁亥進士除知烏程
縣縣故繁劇號難治剔釐奸弊讐服豪強漕糧立倒厥法
他縣多倣之擒治太湖巨盜親搏戰水上獲渠魁白花蛇
沈三卽斃之獄不令得關通上官復爲縱釋殺黨羽二百
餘人羣盜震懼不敢止五百里內廉幹名傾兩浙長與歸
安同時缺令民爭求璽署其縣事鬪於府治前歸安民奪

肩輿去乃定以憂去久之用錢糧磨勘復至縣縣民競供
薪米八年竟謫四川按察司照磨署通江簡州皆有惠政
在湖時監司有修卻者適被論或以其罪款呈卽焚之曰
無爲訐事也著有鑣山集若干卷璽文學幹操志不在小
而偃蹇仕途其詩尤多感慨陶鎔涵濡自達所詣其文辭
置之歐曾集中巧眼不能辨也

朝邑志